

## **Eger lo asubere akwap**

**1** <sup>1</sup> Kolong anakisiakinet, asubuni Akuj adis ka akwap.\*

<sup>2</sup> Amam ibore ekwaanatar akwap, peapedorio atamar erai akwap nyo. Aribokinit ngakipi na aburicharito ibore daang. Alosi Etaui a Akuj\* alokidiana ngakipi. <sup>3</sup> Sodi tolim Akuj tama, "Ejoikinit akicha emini." Sodi min akicha. <sup>4</sup> Sodi kingolik Akuj atamar ejok akicha. Sodi totiak Akuj akicha ka aribu. <sup>5</sup> Tanyara Akuj akicha Apaa-ran, ani aribu tanyara Akwaar. Toliwor ibore atabong ka ataparach, a akwaar ana a ekingaren.

<sup>6</sup> Sodi tolim Akuj tama, "Ejoikinit emini atorite kiding ngakipi na etiaki ngakipi ngatiaket ngaarei." <sup>7</sup> Tosubak Akuj atorite ngina sodi totiak ngakipi na ayakasi kidiana atorite ka ngakipi na ayakasi kwap keng. Tosubakin nguna loger ngolo. <sup>8</sup> Sodi tanyara Akuj atorite ngina Adis. Toliwor ibore atabong ka ataparach, a akwaar ana a ngaarei.

<sup>9</sup> Sodi tolim Akuj tama, "Ejoikinit ngakipi na eyakasi kwap adis echunakinosi wapei sodi tatakanu akwap nakoonon." Sodi tosubakin nguna loger ngolo. <sup>10</sup> Tanyara Akuj nikoonon Akwap, ani ngakipi na achunakina wapei tanyara Anam. Sodi kingolik Akuj nguna atamar ejokak. <sup>11</sup> Sodi tolim Akuj tama, "Ejoikinit akwap elibuni, toruput ngikito lu eyakasi ngichok, nabo toruput ngikito lua ageor ka luche. Toruput ngikito lugelagelae anakwap a eger kech. Sodi tosubakin nguna loger ngolo. <sup>12</sup> Tolibu akwap ngaugia ngagelagelae a ngikito. Toruput ngikinyam lu itao namanat ka ngikito a ageor, ta ngikito luche lua ngichok. Sodi kingolik Akuj nguna atamar ejokak. <sup>13</sup> Toliwor ibore atabong ka ataparach, a akwaar ana a ngauni.

\*1:1 Kolong anakisiakinet...adis ka akwap; kori Naesiakinea Akuj akisub adis ka akwap.

\*1:2 Etaui a Akuj; kori agogongu a Akuj, kori ekuwam a Akuj.

<sup>14</sup> Sodi tolim Akuj tama, “Ejoikinit epete ngiborei lu echayete natorite a adis sodi totiaka apaaran ka akwaar. Toliworos kesi eyenere ngirwa ka ngikaru. <sup>15</sup> Echayete kesi anatorite a adis minio akicha nakwap.” Sodi tosubakin nguna loger ngolo. <sup>16</sup> Tosubak Akuj ngiborei lu echayete luapolok ngiarei, topolok akolong apaaran sodi topolok elap akwaar. Tosubak tani ngikanyer. <sup>17</sup> Kiwaak Akuj ngiborei lu echayete ngulu natorite a adis, sodi kinwakut akwap <sup>18</sup> ka apolokin apaaran ka akwaar nabo totiaka akicha ka aribu. Sodi kingolik Akuj nguna atamar ejokak. <sup>19</sup> Toliwor ibore atabong ka ataparach a akwaar ana a ngoomwon.

<sup>20</sup> Sodi tolim Akuj tama, “Ejoikinit ngiborei lu eyarete ilelebun nakipi, nabo ejoikinit ngikeny eporito anatorite a adis ana eyei kidiama akwap.” <sup>21</sup> Sodi tosubak Akuj ngitieng luapolok a anam ka ngiborei daang lu eyarete lu eyakasi nakipi, ta ngikeny daang. Sodi kingolik Akuj nguna atamar ejokak. <sup>22</sup> Topia Akuj kesi tama, “Ngiborei daang lu iyakasi nakipi, toureta kileleba anam.” Tolimok ngikeny atamar talalakearos anakwap. <sup>23</sup> Toliwor ibore atabong ka ataparach, a akwaar ana a ngakan.

<sup>24</sup> Tolim Akuj tama, “Ejoikinit akwap ilelebun ngitieng lu eyarete lugelagelae lu ikote ngibaren ka ngiborei lu eliato ta ngitieng lu alomoding.” Sodi tosubakin nguna loger ngolo. <sup>25</sup> Tosubak Akuj etiengit a moding a eger keng, ani ibarasit tosubak a eger keng, ani ibore daang ni eliat tosubak a eger keng. Sodi kingolik Akuj nguna atamar ejokak.

<sup>26</sup> Sodi tolim Akuj tama, “Atosubakisi itwaan kikwaan-  
nikin ka ngoni, sodi topolok ngikolia, ka ngikeny, ka ngitieng, ka akwap daang, ta ibore cha daang ni eliat alokwap.\*” <sup>27</sup> Sodi tosubak Akuj itwaan ikwaan ka ngesi. Tosubak Akuj ekile ka aberu. <sup>28</sup> Topia Akuj kesi, sodi tolimok tama, “Toureta, talalaketa nabo topetakinok

\*1:26 Igitae nakitab ache nangorot kona:— ngitieng lu eraakasi ngibaren ka lua alomoding. Ani a Ngaeburaniae, eraakasi ngibaren ka akwap daang.

1:27-28 Akis 15:1-2

wadaang, toreut ibore daang. Topolokisi ngikolia, ka ngikeny, ta ngiborei daang lu eliato alokwap.” <sup>29</sup> Tolim Akuj tama, “Kingolik a, kainak ayong iyong ekitoë daang lo eyei nakwap lo ekoniununi echokit, ta ekitoë daang a ageor lo eyei echokit. Eliworosi akimuj kus. <sup>30</sup> Ani etiengit daang lo eyei nakwap, ka ikeny daang, ta ibore daang ni eliat nabo tarai ni eyari, nginya kesi eliworosi akimuj kech.” Tosubakin nguna loger ngolo. <sup>31</sup> Taanyunga Akuj ibore daang ni asubi ngesi kingolik atamar ejok noi. Toliwor ibore atabong ka ataparach a akwaar ana ngakan-kapei.

**2** <sup>1</sup> Aloger kangolo torumor akisub adis ka akwap ta ibore daang ni eyei nikech. <sup>2</sup> Ani akwaar na ngakan-kaarei, arumorit Akuj ibore daang ni asubi. Kiyanga akwaar na ngakan-kaarei, toisik akisub etich keng daang losek asubi. <sup>3</sup> Topia Akuj akwaar na ngakan-kaarei, kitiliwo na ebekoono kainyo eyangari ngesi akwaar ngina. Kainyo akwaar ngina ngesi arumorea Akuj ibore daang ni asubi. <sup>4</sup>Ekokini Akuj esubi adis ka akwap neni.

### **Amana a akwap a Eden**

Akwaar na asubunea Ekapolon Akuj adis ka akwap, <sup>5</sup> amam ngikito ayakasi nakwap. Aringa nginya nyerupuna, kainyo aringa Ekapolon Akuj nyeyauna akiru nakwap, nabo amam itwaan ni adikino itae ngamanat. <sup>6</sup> Nakaneni aleleununete ngakipi alotooma ngalup sodi tolelekis nalup wadaang.

<sup>7</sup> Tosub Ekapolon Akuj itwaan alochoto. Kiyangak Akuj akiyanget na a akiyar lokumes a itwaan kangini. Toliwor ngesi itwaan ni eyari. <sup>8</sup> Kitak Akuj amana kide ni enyaritae Eden. Kiwaak ngesi itwaan ni asubuni ngini neni. <sup>9</sup> Kiturup Ekapolon Akuj ngikito luajokak noi kaina. Araakasi ngikito ngulu lu kiminarete nabo lu kimui aki-nyam. Kiding amana ngina, ayei ekitoë loa akiyar, ta ekitoë lo eyenere naajokak ka naaronok.\*

<sup>10</sup> Aleleununi angolol alo Eden, tolelek amana. Ani enangi neni, totiak toliwor ngangololin ngoomwon. <sup>11</sup> Enya-

\*2:9 lo eyenere naaiokak ka naaronok: kori lo eyenere ngakiro daang.

ritae na ekingaren Pichon, ngina ngesi na iriamit akwap a Apila, na eyei egolit. (<sup>12</sup> Ejok egolit a akwap kangina. Eyei ekitoë lokaakunyon ka ngamoru nakaalak a ngaropiyae.) <sup>13</sup> Angolol na a ngaarei na iriamit akwap a Kuch\* enyaritae Gion. <sup>14</sup> Angolol na a ngauni na itorunit kide akwap a Achuru, enyaritae Tigiri. Enyaritae angolol na a ngoomwon Eupurate.

<sup>15</sup> Kiwaak Ekapolon Akuj ekile mana na a Eden esaki ngesi kita amana ngina nabo kiyok. <sup>16</sup> Tolimok ngesi ekile ngolo tama, "Ipedori iyong akinyam ageor a ngikito kadaang alomana. <sup>17</sup> Nakaneni nyiinyam ageor a ekitoë alo eyenere naajokak ka naaronok, kainyo akwaar na inyamea iyong ageor a ekitoë kangolo, itoani iyong."

<sup>18</sup> Sodi tolim Ekapolon Akuj tama, "Nyejoikinit itwaan iboi alopei, asubakini ayong ikengarakinan keng ni ikwaan ka ngesi." <sup>19</sup> Tosub Ekapolon Akuj ngitieng lua alomoding ka ngikeny, yau nia itwaan sodi tolimonok kesi ngirora. Toliwor ngirora lu alimokini itwaan kesi ngulu kesi araunte ngirora kech. <sup>20</sup> Tolimonok itwaan ngibaren daang ngirora. Tolimonok tani ngikeny, ta ngitieng lu alomoding. Nakaneni amam tani ipei kech ni ekwaan ka ekile ngolo ni apedori akingarakin ngesi. <sup>21</sup> Kitojotoo Ekapolon Akuj ekile ngaju nakapotio, sodi tolem amaran apei anierumor kimulelea neni a akiring. <sup>22</sup> Tosub Ekapolon Akuj aberu anamaran ana alemuni ani a ekile. Yau Ekapolon Akuj aberu ngina nia ekile. <sup>23</sup> Sodi tolim ekile tama,

"Erai tokona naga akoit a ngakoyo kang,  
nabo akiring a akwaan kang.

Enyarao ngesi Aberu,\*

kainyo alemunio ngesi Alokile."

<sup>24</sup> Kotere ngakiro nguna eisikini ekile apakeng ka itokeng kimorikin ka aberu keng, sodi toliworos akwaan apei.

<sup>25</sup> Amam ibore anapito ekile ka aberu keng, nakaneni amam ngileech erumito kesi.

\*2:13 Kuch (na a Mesopotamia); kori Sudan.

\*2:23 Aberu; a Ngaeburaniae, ikwaan akiroït be aberu ka akiroït be ekile.

### Akisech a itwaan

3 <sup>1</sup> Nakaneni aratana emun noi edwangit ngitieng lu alomoding daang lu kolong asubuni Ekapolon Akuj. Kingit ngesi aberu tama, "Be abala mono Akuj nyiinyam ageor a ngikito kadaang alu eyakasi mana a?" <sup>2</sup> Tatachak aberu emun tama, "Kipedoru sua akinyam ageor a ngikito alu eyakasi mana. <sup>3</sup> Nakaneni alimuni Akuj tama, 'Nyii-nyam kori nyiitap ageor a ekitoa alo eyei kiding amana. Kainyo ani kikokis esi neni itoakete.' " <sup>4</sup> Tolimok emun aberu tama, "Iteni dir nyitoakete esi. <sup>5</sup> Erai eyeni Akuj atamar na inyameta esi ageor a ekitoa kangolo, iwosunete esi, kikwaanikinos ka Akuj\* toliworos iyenete naajokak ka naaronok."\* <sup>6</sup> Kingolik aberu atamar ejok ageor a ekitoa kangolo erai anyamat, nabo eminari ngakonyen. Tojoik nabo ngesi ekitoa ngolo ani itoosunio itwaan. Abu ngesi tolem ageor a ekitoa tanyam, nak tani lokile keng tanyam ngolo dang. <sup>7</sup> Ani ewosunete kesi, toyena atamar emam ibore enapito kesi. Todonyo kesi ngakui a ekitoa alo ikwaan ka emeyan sodi tanapa anaaborin.

<sup>8</sup> Anierumor kiirasi kesi etoil a Ekapolon Akuj elosi alomana ebong na ayonia akolong. Toduka ekile ka aberu keng alotooma ngikito a amana, esakete Ekapolon Akuj nyeanyunga kesi. <sup>9</sup> Nakaneni tanyara Ekapolon Akuj ekile, kingit tama, "Aliwae iyei iyong?" <sup>10</sup> Tatachu ekile tama, "Abu eira etoil kon alomana, atoem sodi atoduk kainyo amam ibore anapit." <sup>11</sup> Kingit Akuj ngesi tama, "Ngae kilimokini iyong atamar emam ibore inapit? Kori robo inyam iyong ageor a ekitoa alokolong kadungokini ayong iyong atamar nyiinyam?" <sup>12</sup> Tatachu ekile tama, "Aberu nakolong kiinakini iyong ayong atamar eruko ka ayong, ngesi kainakini ageor a ekitoa kangolo sodi atanyam ayong." <sup>13</sup> Sodi kingit Ekapolon Akuj aberu tama, "Anukiro na isub iyong nugu?" Tatachu aberu tama, "Kengalae ayong emun, sodi atanyam ageor."

\*3:5 kikwaanikinos ka Akuj; kori kikwaanikinos ka ngakujo.

\*3:5 iyenete naajokak ka naaronok; kingolik 2:9

### Eriras a Akuj

- <sup>14</sup> Tolimok Ekapolon Akuj emun tama,  
“Kona ikokinea iyong neni,  
kilami iyong akidwang ngibaren daang,  
ka ngitieng lua alomoding.  
Iliwor iyong iliat a akook,  
nabo inyami iyong apua ngirwa daang lu iyarea iyong.
- <sup>15</sup> Keteremokini ayong iyong ka aberu,  
nabo eremokinosi itaok kon ka ales a aberu.  
Kipirisaari ngesi iyong akou,  
sodi tokony iyong ngesi natitinyo.”
- <sup>16</sup> Tolimok Ekapolon Akuj aberu tama,  
“Eatakini ayong apipilu toliwor iriaba iyong lokojokon,  
na isakea iyong akidoun.  
Tani kikoni neni dang,  
eliwor ekile kon iitanit iyong,  
nabo kipolokini ngesi iyong.”
- <sup>17</sup> Tolimok Ekapolon Akuj Adam tama,  
“Kona iirarea iyong ngakiro a aberu kon,  
sodi tanyam ageor a ekito e alokolong kalimokinit  
ayong iyong atamar nyiinyam,  
elam ngalup kotere iyong.  
Ngirwa daang lu iyarea iyong,  
isubi iyong etich lokaagongon analup,  
taanyunea akimuj na inyami.
- <sup>18</sup> Erupunete edoan ka ngiikwa,  
nakaneni inyami iyong ngikito lu alomoding.
- <sup>19</sup> Erai mati kisub etich lokojokon kichida ngakiinyir  
ngesi ianyunea akimuj analup.  
Tanang kinukakinio iyong nalup  
nakolong kilemunere.  
Kisubunio iyong anapua,  
nakaneni napua ngesi ibongori.”
- <sup>20</sup> Tolimok Adam\* aberu keng ekiro be Awa, kainyo  
arai ngesi itokeng kadaang alu eyarete. <sup>21</sup> Tosubak Ekapo-

\*3:20 Adam; kori Itwaan. Erai akiroit be Adam a Ngaeburaniae eger  
keng atamar “Itwaan.”

lon Akuj Adam ka aberu keng ngileui sodi kitanap.

**Etwarakinio Adam ka Awa alomana**

<sup>22</sup> Tolim Ekapolon Akuj tama, "Tokona, ekwaanikin itwaan ka ngoni ayen naajokak ka naaronok.\* Edikino tokona ngesi elemuni ageor na ekitoa alo a akiyar tanyam, sodi toyar nakajik." <sup>23</sup> Kotere ngakiro nguna, kitwarak Akuj ngesi alomana a Aden, toliwor itae ngamanat analup anakolong alemunere. Kitwarak Ekapolon Akuj itwaan ngini. <sup>24</sup> Kiwaak ngiborei lua ngabeben kide amana a Eden. Ayei ekileng lo ekoni asarae neni lo areianar lowaitin daang, iyoki erot lo ateni lokitoa a akiyar.

**The book of *Genesis* in Turkana, a new translation published by the Bible Society of Kenya, P.O. Box 72893, Nairobi.**

**©U.B.S. 1987**